

*Prečišćeni tekst Zakona o nadzoru nad tržištem u BiH („Sl.gl. BiH“, br. 45/04, 44/07 i 102/09). Prečišćeni tekst se koristi samo za internu upotrebu, i na isti se ne može pozivati prilikom službene upotrebe.*

Na osnovu člana IV 4. a) Ustava Bosne i Hercegovine, Parlamentarna skupština Bosne i Hercegovine na sjednici Predstavničkog doma, održanoj 27. jula 2004. godine, i sjednici Doma naroda, održanoj 9. septembra 2004. godine, usvojila je

## ZAKON

### O NADZORU NAD TRŽIŠTEM U BOSNI I HERCEGOVINI

*(„Službeni glasnik BiH“, br. 45/04, 44/07 i 102/09)*

#### I - OPĆE ODREDBE

##### Cilj i obim

##### Član 1.

- (1) Ovim zakonom uređuje se nadzor sigurnosti proizvoda stavljenih na tržište Bosne i Hercegovine (u daljem tekstu: nadzor nad tržištem), uspostavlja se sistem nadzora nad tržištem i uređuju pitanja u vezi sa tim, u cilju osiguranja visokog nivoa zaštite zdravlja i sigurnosti ljudi, životinja, biljaka, imovine i okoliša.
- (2) Ovaj zakon primjenjuje se na sve proizvode definirane članom 2. ovog zakona čiji će zahtjevi za sigurnost biti uređeni Zakonom o općoj sigurnosti proizvoda ili posebnim tehničkim propisom.

##### Definicije

##### Član 2.

Pojmovi koji se upotrebljavaju u ovom zakonu imaju sljedeće značenje:

a) **Proizvod** je svaki neprehrambeni proizvod koji je namijenjen potrošačima ili koji bi u razumno predvidljivim uslovima mogao biti upotrijebljen od potrošača čak i ako im nije namijenjen, a koji je isporučen ili učinjen dostupnim, uz plaćanje ili besplatno u okviru kakve trgovinske djelatnosti, uključujući i proizvod isporučen ili učinjen dostupnim u okviru pružanja usluga, bez obzira na to da li je nov, upotrijebljen ili prepravljen.

Ova definicija proizvoda ne odnosi se na polovne proizvode koji se dobavljaju kao *antikviteti* ili na proizvode koji zahtijevaju popravku ili prepravku prije upotrebe, pod uslovom da dobavljač u tom smislu jasno obavijesti osobu kojoj dostavlja dati proizvod.

Ova definicija primjenjuje se i na opremu, uređaje, instrumente i druge proizvode čiji su zahtjevi za sigurnost uređeni posebnim tehničkim propisom.

b) **Siguran proizvod** je svaki proizvod koji u uobičajenim ili razumno predvidljivim uslovima upotrebe, uključujući trajanje i, po potrebi, stavljanje u upotrebu, zahtjeve za ugradnju i održavanje, ne predstavlja nikakav rizik ili samo najmanji rizik spojiv s

*Prečišćeni tekst Zakona o nadzoru nad tržištem u BiH („Sl.gl. BiH“, br. 45/04, 44/07 i 102/09). Prečišćeni tekst se koristi samo za internu upotrebu, i na isti se ne može pozivati prilikom službene upotrebe.*

upotrebom proizvoda, a koji se smatra prihvatljivim i saglasnim s visokim nivoom zaštite sigurnosti i zdravlja potrošača, posebno uzimajući u obzir sljedeće elemente:

- karakteristike proizvoda, posebno njegov sastav, pakovanje, uputstva za sklapanje te, po potrebi, ugradnju i održavanje,
- utjecaj proizvoda na druge proizvode u slučaju kad se razumno može predvidjeti da će se on upotrebljavati s drugim proizvodima,
- predstavljanje proizvoda, njegovo označavanje, upozorenja i uputstva za njegovu upotrebu i odlaganje nakon upotrebe i sve druge oznake ili obavijesti koje se odnose na taj proizvod,
- kategorije potrošača izloženih riziku kad upotrebljavaju određeni proizvod, posebno djecu i starija lica.

Mogućnost da se kod proizvoda postigne viši nivo sigurnosti ili dostupnost proizvoda koji predstavljaju niži stepen rizika, ne može biti osnov da bi se proizvod smatrao opasnim.

c) **Opasan proizvod** je svaki proizvod koji nije saglasan s definicijom za siguran proizvod iz tačke b) ovoga člana.

d) **Ozbiljan rizik** je svaki rizik koji zahtijeva brzo djelovanje nadležnih organa u Bosni i Hercegovini, uključujući i rizik čije posljedice nisu trenutne.

e) **Proizvođač** je:

- svako pravno lice, ili poduzetnik ili fizičko lice sa sjedištem, odnosno prebivalištem u Bosni i Hercegovini koje se bavi izradom, doradom ili preradom proizvoda i svako drugo lice koje se predstavlja kao proizvođač, stavljajući na proizvod svoje ime, žig ili drugi znak razlikovanja;
- predstavnik proizvođača, ako proizvođač nema sjedište, odnosno prebivalište u Bosni i Hercegovini, ili uvoznik proizvoda, ako proizvođač nema predstavnika proizvođača sa sjedištem, odnosno prebivalištem u Bosni i Hercegovini;
- drugo pravno lice, ili poduzetnik ili fizičko lice u lancu snabdijevanja, koje obavlja trgovinu i/ili trgovinske usluge, u mjeri u kojoj njegova aktivnost može uticati na sigurnosne karakteristike proizvoda.

f) **Distributer** je svako pravno lice, ili poduzetnik ili fizičko lice koje obavlja trgovinu i/ili trgovinske usluge i koje u lancu snabdijevanja svojom aktivnošću ne utiče na sigurnosne karakteristike proizvoda.

g) **Povrat proizvoda od potrošača** podrazumijeva svaku mjeru usmjerenu na vraćanje opasnog proizvoda kojeg je proizvođač ili distributer već isporučio potrošaču ili ga učinio dostupnim potrošaču.

h) **Povlačenje proizvoda sa tržišta** je svaka mjera usmjerena na sprečavanje distribucije i izlaganja, te nuđenje opasnog proizvoda potrošačima.

i) **Stavljanje proizvoda na tržište** je prva radnja kojom se proizvod prvi put stavlja na raspolaganje, bilo za novac bilo besplatno, na tržište Bosne i Hercegovine s namjerom distribuiranja ili upotrebe na tržištu Bosne i Hercegovine.

*Prečišćeni tekst Zakona o nadzoru nad tržištem u BiH („Sl.gl. BiH“, br. 45/04, 44/07 i 102/09). Prečišćeni tekst se koristi samo za internu upotrebu, i na isti se ne može pozivati prilikom službene upotrebe.*

j) **Stavljanje proizvoda u upotrebu** podrazumijeva trenutak prve upotrebe proizvoda u Bosni i Hercegovini od strane krajnjeg korisnika.

k) **Opasna imitacija** je opasan proizvod obmanjujućeg izgleda, koji nije prehrambeni proizvod, ali svojim oblikom, mirisom, bojom, vanjskim izgledom, pakovanjem, oznakama, obimom ili veličinom liči ili podsjeća na prehrambeni proizvod, tako da postoji mogućnost da ga potrošači, posebno djeca, ne razlikuju od prehrambenog proizvoda i uslijed toga ga stave u usta, sisaju ili progutaju, što može predstavljati opasnost i izazvati npr. gušenje, trovanje te perforiranje ili opstrukciju probavnog trakta.

l) **Tehnički propis** je propis u kojem se tehnički zahtjevi uređuju direktno ili upućivanjem na standard, tehničku specifikaciju, uputstva za primjenu ili kodeks praksi ili uključivanjem sadržaja tih dokumenata.

m) **Nadzor nad tržištem** podrazumijeva cjelovit sistem mjera, postupaka i radnji organa iz sistema nadzora nad tržištem koje se provode da bi se osiguralo da proizvodi na tržištu zadovoljavaju propisane zahtjeve za sigurnost a uključuju nadziranje i poduzimanje mjera i radnji radi usklađivanja s propisanim zahtjevima.

## II - OPĆI PRINCIPI NADZORA NAD TRŽIŠTEM

Član 3.

izbrisan

### **Proporcionalnost i predostrožnost**

Član 4.

Prilikom poduzimanja mjera radi osiguranja usklađenosti zahtjeva za sigurnost proizvoda sa propisima iz člana 1. stav 2. ovog zakona, a naročito prilikom donošenja odluka o mjerama usmjerenim na povlačenje proizvoda sa tržišta i povrat proizvoda od potrošača, organi iz sistema nadzora nad tržištem osiguravaju proporcionalnost mjera ustanovljenom sigurnosnom riziku, uz dužno uvažavanje trenutnog stanja nauke i tehnike u pogledu mogućih neposrednih ili posrednih, trenutnih ili odgođenih opasnosti za zdravlje i sigurnost potrošača (princip predostrožnosti).

### **Saradnja**

Član 5.

Radi osiguranja efikasnog nadzora nad tržištem, što podrazumijeva jednoobraznu i djelotvornu primjenu ovog zakona kao i propisa člana 1. stav 2. ovog zakona, izbjegavanja različite prakse nadzora nad tržištem i preklapanja nadležnosti u provođenju nadzora, organi iz sistema nadzora nad tržištem međusobno saraduju, uzajamno razvijajući povjerenje i transparentnost, omogućavajući i podstičući saradnju s drugim državama i međunarodnim organizacijama.

*Prečišćeni tekst Zakona o nadzoru nad tržištem u BiH („Sl.gl. BiH“, br. 45/04, 44/07 i 102/09). Prečišćeni tekst se koristi samo za internu upotrebu, i na isti se ne može pozivati prilikom službene upotrebe.*

## **Transparentnost**

### Član 6.

- (1) Informacije kojima raspolažu organi iz sistema nadzora nad tržištem, a odnose se na rizike za sigurnost i zdravlje ljudi i životinja ili zaštitu životne sredine kao i informacije o poduzetim mjerama su dostupne javnosti.
- (2) Javnost informacija iz stava 1. ovog člana ne odnosi se na podatke o proizvodu koji se tiču profesionalne tajne, izuzev kada su sigurnosni rizici takvog obima da okolnosti konkretnog slučaja zahtijevaju njihovo javno objavljivanje radi prevencije tih rizika.
- (3) Organi iz sistema nadzora nad tržištem dužni su osigurati efektivno poštivanje zaštite profesionalne tajne od strane svojih zvaničnika, službenika ili namještenika.

## **III - ORGANIZACIJA I FUNKCIONIRANJE SISTEMA NADZORA NAD TRŽIŠTEM**

### **Sistem nadzora nad tržištem i provođenje nadzora**

#### Član 7.

- (1) Sistem nadzora nad tržištem Bosne i Hercegovine čine:
  - a) Agencija za nadzor nad tržištem Bosne i Hercegovine (u daljnjem tekstu: Agencija),
  - b) Inspeksijski i drugi organi uprave Federacije Bosne i Hercegovine, Republike Srpske i Brčko Distrikta Bosne i Hercegovine koji su posebnim zakonima i drugim propisima ovlašteni za obavljanje inspeksijskih i drugih poslova koji se odnose na kontrolu sigurnosti proizvoda na tržištu Bosne i Hercegovine (u daljnjem tekstu: nadležni organi)
- (2) Organi iz sistema nadzora nad tržištem, u skladu sa svojim nadležnostima, nadziru usklađenost proizvoda koji su stavljeni na tržište sa zahtjevima za sigurnost proizvoda utvrđenim Zakonom o općoj sigurnosti proizvoda i posebnim tehničkim propisima, ispunjavanje obaveza proizvođača i distributera sadržanih u ovim propisima te poduzimaju mjere i radnje, kako bi se osigurala usklađenost proizvoda sa propisanim sigurnosnim zahtjevima.

#### Član 8.

izbrisan

### **Ovlaštenja i odgovornosti nadležnih organa**

#### Član 9.

- (1) U provođenju ovog zakona a naročito u ostvarivanju ciljeva nadzora nad tržištem nadležni organi, osim mjera za čije su poduzimanje ovlašteni drugim propisima, ovlašteni su da poduzmu i sljedeće mjere:

*Prečišćeni tekst Zakona o nadzoru nad tržištem u BiH („Sl.gl. BiH“, br. 45/04, 44/07 i 102/09). Prečišćeni tekst se koristi samo za internu upotrebu, i na isti se ne može pozivati prilikom službene upotrebe.*

a) za bilo koji proizvod:

- da izvrše, čak i nakon što je bio stavljen na tržište kao siguran, odgovarajuće provjere njegovih sigurnosnih svojstava, u odgovarajućoj razmjeri, sve do konačnog stadija upotrebe ili potrošnje;
- da uzmu uzorke proizvoda s ciljem ispitivanja sigurnosnih svojstava;
- da zahtijevaju sve neophodne informacije od zainteresiranih strana;

b) za bilo koji proizvod koji bi mogao predstavljati rizik pod određenim uslovima:

- da nalože da on bude označen odgovarajućim, jasno izrečenim i lako shvatljivim upozorenjima o rizicima koje on može predstavljati na jezicima koji su u službenoj upotrebi u Bosni i Hercegovini;
- da nalože da se za njegovo stavljanje na tržište ispune preduslovi kako bi se on učinio sigurnim;

c) za bilo koji proizvod koji bi mogao predstavljati rizik za određena lica:

- da nalože da se izda upozorenje o opasnosti pravovremeno i u odgovarajućem obliku uključujući publiciranje posebnih upozorenja;

d) za bilo koji proizvod koji bi mogao biti opasan:

- da privremeno zabrane njegovu isporuku, ponudu za isporuku ili njegovo prikazivanje za vremenski period potreban da se izvrše sigurnosne procjene, provjere i analize;

e) za bilo koji opasan proizvod:

- da zabrane njegovo stavljanje na tržište;

f) za bilo koji opasan proizvod koji je već na tržištu:

- da nalože ili organiziraju trenutno povlačenje proizvoda s tržišta, prikazivanje i nuđenje potrošačima i upozore na odgovarajući način potrošače na opasnosti koje on predstavlja;
- da nalože proizvođačima i distributerima povrat proizvoda od potrošača i njegovo uništavanje po važećim propisima od strane i na teret proizvođača, odnosno distributera;

g) za bilo koji proizvod koji je opasna imitacija:

- da zabrane proizvodnju, uvoz, izvoz ili stavljanje na tržište.

(2) Kada postupaju vršeci nadzor nad proizvodima čiji su zahtjevi za sigurnost uređeni propisima iz člana 1. stav 2. ovog zakona, nadležni organi podstiču i promoviraju dobrovoljne akcije proizvođača i distributera, u skladu s obavezama koje su im nametnute ovim propisima, uključujući, tamo gdje je to primjenjivo, razvoj kodeksa dobre prakse.

(3) Kada je neophodno, nadležni organi nalažu mjere predviđene u tački f) ovog člana, ukoliko akcija poduzeta od strane proizvođača i distributera na ispunjavanju njihovih obaveza nije zadovoljavajuća ili je nedovoljna. Povrat proizvoda od potrošača koristi se kao posljednja mjera.

*Prečišćeni tekst Zakona o nadzoru nad tržištem u BiH („Sl.gl. BiH“, br. 45/04, 44/07 i 102/09). Prečišćeni tekst se koristi samo za internu upotrebu, i na isti se ne može pozivati prilikom službene upotrebe.*

- (4) Nadležni organi ovlašteni su da poduzmu neophodne radnje i primjene odgovarajuće mjere kao što su one navedene u tački b) do g) ovog člana kada proizvodi predstavljaju ozbiljan rizik. Ozbiljnost rizika cijeni se uzimajući u obzir okolnosti i odlike svakog pojedinačnog slučaja.
- (5) Nadležni organi donose rješenje za mjere iz stava 1. tačke b) do g) ovog člana.
- (6) Žalba protiv rješenja iz stava 5. ovog člana se izjavljuje u roku od osam dana.
- (7) Žalba protiv rješenja iz stava 5. ovog člana ne odgađa izvršenje rješenja.

### **Subjekti prema kojima nadležni organi mogu izricati mjere**

#### Član 10.

Mjere iz člana 7. ovog zakona, koje nadležni organi poduzimaju u vršenju svojih ovlaštenja, mogu biti usmjerene na:

- a) proizvođača u smislu člana 2. ovog zakona;
- b) distributera, u granicama njegove djelatnosti, a naročito na osobe odgovorne za početnu distribuciju na tržištu Bosne i Hercegovine;
- c) bilo koju drugu osobu, kada je to neophodno za ostvarivanje saradnje u mjerama poduzetim radi izbjegavanja rizika koji potiču od proizvoda.

### **Osnivanje Agencije za nadzor nad tržištem**

#### Član 11.

- (1) Ovim zakonom se, u cilju osiguranja funkcionalnog i efikasnog sistema nadzora nad tržištem, obavljanja tehničkih, koordinacionih i drugih poslova utvrđenih zakonom, te poslova čije obavljanje proističe iz međunarodnih pravnih akata koji obavezuju Bosnu i Hercegovinu, osniva Agencija.
- (2) Agencija je samostalna upravna organizacija, ima svojstvo pravne osobe i sva prava i obaveze utvrđene ovim zakonom.
- (3) Agencija se finansira iz Budžeta institucija Bosne i Hercegovine.
- (4) Sjedište Agencije je u Istočnom Sarajevu.

### **Rukovođenje, upravljanje i odgovornost Agencije**

#### Član 12.

- (1) Agencijom rukovodi direktor u saradnji sa zamjenikom direktora i pomoćnicima direktora u skladu sa zakonom, Pravilnikom o unutrašnjoj organizaciji Agencije, kao i drugim općim aktom.
- (2) Direktora i zamjenika direktora Agencije imenuje Vijeće ministara na period od četiri godine, s tim da na istu funkciju mogu biti imenovani još jedan mandat. Pomoćnici direktora imenuju se u skladu sa Zakonom o državnoj službi u institucijama Bosne i Hercegovine ("Službeni glasnik BiH", br. 19/02, 35/03, 4/04 i 17/04).

*Prečišćeni tekst Zakona o nadzoru nad tržištem u BiH („Sl.gl. BiH“, br. 45/04, 44/07 i 102/09). Prečišćeni tekst se koristi samo za internu upotrebu, i na isti se ne može pozivati prilikom službene upotrebe.*

- (3) Direktor, zamjenik direktora i pomoćnici direktora ne mogu biti iz reda istog konstitutivnog naroda Bosne i Hercegovine.
- (4) Direktor i zamjenik direktora Agencije za svoj rad odgovaraju Vijeću ministara Bosne i Hercegovine.

## **Zadaci Agencije**

### Član 13.

Zadaci Agencije su:

- a) osiguranje sistematičnog, usklađenog i djelotvornog sistema nadzora nad tržištem Bosne i Hercegovine;
- b) razvoj međudržavne i međunarodne saradnje u oblasti nadzora nad tržištem uključujući integriranje Bosne i Hercegovine u institucionalne i administrativne strukture međunarodne saradnje;
- c) promocija i razvoj naučnog i stručnog znanja, spoznaja i metodologije i njihova primjena u formuliranju i provođenju politike nadzora nad tržištem;
- d) promocija i izgradnja profesionalnih i stručnih kapaciteta u svim strukturama nadzora nad tržištem;
- e) afirmacija principa nezavisnosti, nepristrasnosti i nediskriminacije u provođenju nadzora nad tržištem;
- f) podizanje nivoa sigurnosti ljudi i životinja, te zaštita životne sredine od opasnih proizvoda.

## **Nadležnosti Agencije**

### Član 14.

U svrhu provođenja ovog zakona, Agencija ima sljedeće nadležnosti:

- a) koordinira i usklađuje aktivnosti sistema nadzora nad tržištem Bosne i Hercegovine;
- b) osigurava identično i jednoobrazno provođenje propisa o sigurnosti proizvoda na teritoriji Bosne i Hercegovine, uključujući tumačenje propisa o sigurnosti proizvoda i izdavanje smjernica za njihovo provođenje;
- c) učestvuje u pripremi i izradi svih propisa o sigurnosti proizvoda bilo da se donose na nivou entiteta ili Bosne i Hercegovine, osiguravajući primjenu aktuelnih naučnih i stručnih saznanja, te iskustava dobre prakse, naročito savremenih iskustava i pravne prakse zemalja članica Evropske unije;
- d) učestvuje, podstiče i pomaže razvoj stručnih i profesionalnih kapaciteta u svim strukturama nadzora nad tržištem;
- e) osigurava naučnu i tehničku podršku svim nadležnim organima u okviru svog djelokruga o pitanjima koja se tiču nadzora nad tržištem;

*Prečišćeni tekst Zakona o nadzoru nad tržištem u BiH („Sl.gl. BiH“, br. 45/04, 44/07 i 102/09). Prečišćeni tekst se koristi samo za internu upotrebu, i na isti se ne može pozivati prilikom službene upotrebe.*

- f) vrši promociju izgradnje kapaciteta u oblasti certificiranja i testiranja i dokazivanja kompetentnosti putem akreditiranja;
- g) osigurava unificirane procedure za postupanje po prigovorima potrošača koji se tiču sigurnosti proizvoda ili rada nadležnih organa, njihovo centralno evidentiranje, praćenje rješavanja i informiranje javnosti o dostupnosti takvih mehanizama a u cilju jednake zaštite potrošača na cijelom tržištu Bosne i Hercegovine;
- h) uspostavlja efikasne, formalne i/ili neformalne mehanizme međusobne saradnje svih aktera sistema nadzora nad tržištem;
- i) permanentno informira javnost i sve zainteresirane subjekte o aktivnostima u provođenju nadzora nad tržištem;
- j) provodi međunarodnu i međudržavnu saradnju u oblasti nadzora nad tržištem, posebno saradnju s Evropskom unijom i nadležnim organima zemalja članica te Svjetskom trgovinskom organizacijom, prati i provodi izvršavanje obaveza Bosne i Hercegovine proisteklih iz te saradnje te inicira zakonodavne, administrativne i institucionalne mjere potrebne za ostvarivanje te saradnje;
- k) periodično informira organe vlasti Bosne i Hercegovine i entiteta o stanju u oblasti nadzora nad tržištem.

## **Saradnja u okviru sistema nadzora nad tržištem**

### **Član 15.**

Kako bi se osigurao djelotvoran nadzor nad tržištem koji će garantirati visok nivo zaštite zdravlja i sigurnosti ljudi, životinja, biljaka, imovine i životne sredine, organi iz sistema nadzora nad tržištem međusobno saraduju, razvijajući uzajamno povjerenje i transparentnost, osiguravajući primjenu odgovarajućih sredstava i postupaka a naročito:

- a) uspostavu, periodično ažuriranje i provođenje programa sektorskog nadziranja po kategorijama proizvoda ili rizika, kao i posmatranja nadzornih aktivnosti, nalaza i rezultata
- b) dalje praćenje i ažuriranje naučnih i tehničkih saznanja koja se tiču sigurnosti proizvoda;
- c) periodično preispitivanje i ocjenjivanje funkcioniranja kontrolnih aktivnosti i njihove djelotvornosti i, ukoliko je neophodno, reviziju nadzornog pristupa i postojeće organizacije.



*Prečišćeni tekst Zakona o nadzoru nad tržištem u BiH („Sl.gl. BiH“, br. 45/04, 44/07 i 102/09). Prečišćeni tekst se koristi samo za internu upotrebu, i na isti se ne može pozivati prilikom službene upotrebe.*

#### IV - OBAVEZE I ODGOVORNOSTI PROIZVOĐAČA I DISTRIBUTERA U SISTEMU NADZORA NAD TRŽIŠTEM

##### **Obaveze i odgovornosti proizvođača i distributera**

###### Član 16.

- (1) Proizvođač i distributer su dužni poznavati i osigurati primjenu zakona i tehničkih propisa o sigurnosti proizvoda koji se odnose na proizvode koji su predmet njihove djelatnosti.
- (2) Proizvođači su dužni provoditi primjenjive kodekse, kao što su Kodeks dobre proizvodne prakse (GMP) i Kodeks dobre laboratorijske prakse (GLP).
- (3) Proizvođač je odgovoran za usklađenost proizvoda sa općim ili posebnim zahtjevima za sigurnost proizvoda prema odredbama Zakona o općoj sigurnosti proizvoda i/ili posebnim tehničkim propisima.

#### V - POSEBNE OBAVEZE I ODGOVORNOSTI AGENCIJE

##### **Obavješćavanje o riziku i opasnim proizvodima**

###### Član 17.

- (1) Agencija blagovremeno informira javnost i zainteresirane subjekte u Bosni i Hercegovini i inozemstvu o riziku i opasnim proizvodima.
- (2) Agencija djeluje u operacijama iz svoje nadležnosti u saradnji s organima drugih država Evrope nadležnim za sigurnost proizvoda, a posebno u formi administrativne saradnje, kako bi se omogućilo:
  - a) razmjena informacija o ocjenjivanju rizika, opasnim proizvodima, metodama testiranja i rezultatima, skorašnjim naučim dostignućima kao i drugim aspektima relevantnim za aktivnosti kontrole;
  - b) uspostavljanje i provođenje projekata zajedničkog nadzora i ispitivanja;
  - c) razmjena znanja i dobre prakse i saradnja u aktivnostima obuke;
  - d) unapređenje saradnje s Evropskom unijom vezano za praćenje, povlačenje proizvoda sa tržišta i povrat opasnih proizvoda od potrošača.

#### VI - PRIJELAZNE ODREDBE

###### Član 18.

Ovaj zakon stupa na snagu osmog dana od dana objavljivanja u "Službenom glasniku BiH".